



UMP, Kedutaan Besar Yemen eratkan hubungan dua hala

Menyedari kepentingan hubungan diplomatik di antara Universiti Malaysia Pahang (UMP) dengan Kedutaan Besar Yemen, satu perjanjian dimetrai kedua-dua pihak dalam memaknakan hubungan dua hala yang sedia terjalin melibatkan Malaysia dan Yemen.

Majlis menandatangani kerjasama (MoU) menyaksikan Naib Canselor UMP, Profesor Dato' Dr. Daing Nasir Ibrahim dan Timbalan Naib Canselor (Akademik & Antarabangsa) Profesor Dr. Badhrulhisham Abd Aziz mewakili UMP, manakala pihak Kedutaan Besar Yemen diwakili Dutanya, H.E Abdulla Al-Montaser dan Kaunselor Kebudayaan, Eqbal Al-Alas pada 16 November 2011 yang lalu di Kedutaan Besar Yemen di Kuala Lumpur.

Hadir sama Timbalan Kaunselor Kebudayaan, Dr. Adnan Al-Sanoy, Penolong Kaunselor Kebudayaan, Mokhtar Al-Maari, Kaunselor, Abdullah Al-Jaboby dan Pengarah Pejabat Antarabangsa UMP, Dr. Norlidah Al-Qadri.

Menurut Dato' Dr. Daing Nasir, bidang kerjasama

ini penting terutamanya dalam mempromosikan UMP sebagai salah satu destinasi pilihan pelajar tajaan kerajaan Yemen bagi menyambung pengajian di UMP.

"Pada masa ini, terdapat seramai enam orang pelajar pascasiswazah yang berasal dari negara itu yang menyambung pengajian di peringkat sarjana dan ijazah kedoktoran di UMP.

"Inisiatif ini juga menggalakkan penyelidikan bersama antara UMP dan universiti, institusi dan industri dari Yemen dalam pemindahan pengetahuan baharu, teknologi dan kemahiran.

"Kerjasama ini memberi peluang kepada kedua-dua pihak dalam meneroka kerjasama dalam bidang akademik dan penyelidikan termasuklah keperluan profesor pelawat, penasihat luar, kajian penyelidikan, latihan industri dan pertukaran staf serta mobiliti pelajar," kata beliau.

Jelasnya, hubungan kerjasama ini juga sebagai usaha memartabatkan kecemerlangan pendidikan dan menjadikan UMP hab pendidikan serantau.